

Clifton Ling

E NEGOSHI DI SUPERMERCADO A BIRA UN "SURVIVAL OF THE FITTEST" NA ARUBA

Pa hopi aña caba e Chinesnan na Aruba ta forma parti di nos comunidad i sigur a contribui na e desaroyo economico di Aruba. Chinesnan ta conoci pa nan disciplina cu tin di haber no solamente cu nan cultura, pero tambe e hecho cu mayoria di nan a bin Aruba cu man bashi. Esey entre otro a resulta, pa con contradictorio cu e por zona, cu hopi Chines a termina cu nan mesun negoshi pa sigui bai dilanti den bida. Clifton Ling (60) i su casa Ingrid Ling ta forma parti di e dos generacion di Chinesnan, nan ta doño di Ling & Sons, un supermercado cu tin su "roots" na San Nicolas mas cu 60 aña pasa.

Di cuminsamento di añanan cuarenta e defunto tata di Clifton, hunto cu tres otro socionan Chines, a cuminsa un "grocery" bou number di Yee Woo Grocery den Village. Nan tabata practicamente e prome Chinesnan na Aruba cu a cuminsa un supermercado e tempo ey. E temponan promer, e "grocery" nan tabata vende e productonan "over the counter", ta hopi mas despues e concepto di "self service" a drenta mercado di Aruba unda nos familia, tabata un di e promenan cu a introduci e concepto nobo aki, segun Clifton. Otro famianan Arubiano cu tabatin un supermercado e tempo ey tabata entre otro famianan De Cuba i Habibe. Durante añanan, e negoshi di familia Ling a sigui desaroya unda den añanan sesenta a habri supermercadonan na Weststraat (Playa) i na Congoweg (San Nicolas). E ruman di Clifton tabata traha na Hawaii na e supermercado Safeway unda el a

experiencia e concepto di "self service". Y asina tambe, na 1965, e familia Ling a trece e concepto aki na Aruba. Pareu cu e introduccion di e concepto nobo aki, e familia a dicidi tambe pa pone "airconditioning" central den e tiendanan. Hopi hende a pensa cu nos tabata loco pa pone airo cu tur e gastonan extra di coriente etc. pero ya, despues tur hende a sigui y pone nan tambe. Den añanan setenta nos a cuminsa nos mesun "wholesale" pa por sigui baha e gastonan i dus baha e prijs pa nos clientenan. Despues den añanan ochenta nos a habri Certified cu tabatin e mesun concepto cu Coruba ("cash & carry") caminda e prijs di e productonan tabata mas importante. E "shelving" di e producto, e bista di e tienda i e servicio en general tabata menos importante. E clientela durante añanan a sigui crece, te cu na dado momento, e supermercado na Weststraat a bira mucho chikito como tambe tabatin hopi

molester di chollenan. Locual tambe a cuminsa hunga un rol tabata e competencia di Pueblo Supermercado (di familia Lacle). Ling tabata considera nan mes como e "frontrunner" den e negoshi di "grocery". Pa mantene e posicion aki nan a dicidi di traha e supermercado na Italiestraat i sera esun di Weststraat. Pa realisa Italiestraat, e supermercado na San Nicolas tambe a keda sera. Italiestraat a habri na 1992, e tabata mas cu 100% mas grandi den área si compara esaki cu Weststraat i e tabata esun mas grandi u luho e tempo ey na Aruba.

Despues cu Kong Hing i Certified a bin den mesun area cu Ling & Sons na Italiestraat, e benta di Ling a baha cu 30%. E ora e plannan a cuminsa pa construi e supermercado existente pa sigui crece i "raise the bar" pa e competencia, manera Clifton ta describ'e. E supermercado existente a habri na 2002.

E area di shop pa e cliente ta tres biaha mas grandi cu esun den Italiestraat.

Na 2002 nos a bira miembro di IGA (Independent Grocery Alliance) cu ta mehora nos posicion competitivo. Cu e productonan independiente produci di IGA nos por combina e productonan nacional di Merca (cu ta e marcanan mayor cu tur supermercado tin) cu esunnan di IGA cu tin e calidad pero cu ta mas barata cu e productonan nacional. E Ling & Sons di awe bo no por compara cu e Yee Woo Grocery cu e tata di Ling tabatin den Village mas cu 60 aña pasa. Di un "eenmanszaak" el a desaroya den un negoshi profesional cu un volumen di venta anual di millones i cu 120 empleado riba "payroll".


Ademas di ta e promer den diferente concepto ya ariba menciona, nan tabata e promer tambe cu a cuminsa cu e proceso di "scanning" di productonan. E siguiente paso den nan lista di "firsts"

lo ta unda e clientenan mes lo bai scan su producto y paga na mes momento via "swipping" di su carchi, sumes. Loke falta pa concretisa e plan aki ta pa logra pa e clientenan por swipe nan carchi via un solo mashin na lugar di uno diferente, pa cada banco.

Locual ta stroba e desaroyo di hopi companianan na Aruba ta e maneho nobo di gobierno pa locual ta permiso pa empleadonan. Clifton tin mas cu seis casonan di empleado den corte pendiente pa huez dicidi riba nan status. Tambe e introduccion di BBO combina cu e anulacion di e "investeringsaftrek" lo pone hopi negociantenan pospone of anula e inviercionnan nobo, segun Ling. El a crea hopi negativismo. E ta hasta crea desesperacion, por ehempel, e ladroñia den nos tienda a aumenta drasticamente, e ta agrega. Aunke Clifton i su casa tin e edad pa bai cu pensioner, e ta

"NOS NO POR GARANTISA E SERVICIO CU NOS TABATA DUNA ANTES PA MOTIBO DI E DIFICULTADNAN PA HAYA PERMISO PA TRAHA"

algo cu nan no ta pensando riba dje. E yunan, cu ta e di tres generacion Chines, no ta cla ainda pa bin bek Aruba i tumar maneho di e negoshi over. Clifton ta bisa cu e i su casa ta prefera sigui traha, pero si mester, ta vende e negoshi of ta tumar un profesional cu no ta famia pa maneha e supermercado. Recien nan a tumar un manager pa maneha e supermercado. E negoshi di supermercado a bira un "survival of the fittest" na Aruba. Tin mas cu 250 supermercado riba un poblacion i un economia cu no ta creciendo cu "doble digits". "Mi concepto ta: bo tin cu duna bek na comunidad pa sobreviví den e negoshi aki" Y sobreviví ta algo cu e familia Ling a muestra e ultimo 60 aña cu nan por. E mentalidad Chines di traha oranan largo i di ta "hands on" den e negoshi ta e formulacion pa éxito. E mesun mentalidad ta pone tambe cu e no ta bai ta facil pa tumar distancia di e negoshi pasina e siguiente generacion tumar over. ■



Fotografía: da Silva